


RUFO WEVER

(8 di december
1917 - 30 di
december
1977):

HISTORIA DI BIDA DI UN GRAN MUSICO Y COMPOSITOR ARUBANO



ORANJESTAD(AAN): -- Awe, 30 di december 1996 ta recorda e 19 aña di fayecimento di e gran musico y compositor Arubano Rufo Wever.

Rufo Inocencio Wever a nace riba 8 di december 1917 na Playa.

E tabata e prome yiu di Leonila Maria Annette Lampe y Civilius Marcial Wever.

Dia cu el a cumpli seis aña, Rufo a haya un harmonica di su tata como su regalo di aña.

Despues di algun dia, el a cuminsa toca e melodia di 'Amor de Cinco Años', un cancion cu tabata popular den e epoca ey.

E ora, tata di Rufo, encurasha pa e talento di su yiu, a compra un piano pe.

Dentro di corto, Rufo a cuminsa toca melodianan sensiyu cu tabata yega na su oido.

Di e manera aki, e carera exitante y fantastico di Rufo cu lo dicidi su bida pa mas cu mitar siglo, a inicia.

Tempo cu Rufo tabata tin diez aña, su tata a fayece diripiente, un perdida terrible cu e mester a enfrenta hunto cu su rumannan Libia Martina, Maria Eusebia y Lucio Rafael.

E malfortuna aki a para Rufo su desaroyo musical pa

un tempo.

Cu diezdos aña bieu sinembargo, el a haci un comeback y a bolbe bira un huesped na cantidad di fiesta, caminda e tabata toca e ultimo hitnan riba su piano.

Hitnan Mericano manera 'Sweet Jennily', 'Yes Sir, she's my baby now', 'Smiles', 'Sonny Boy' y 'Springtime in the Rockies'.

Tambe, cancionnan Latinoamericano y tumbanan di Aruba, Bonaire y Curacao.

Cu dieztres aña di edad, Rufo a actua pa prome biaha pafor di Aruba.

Abordo e barco Maracaibo, el a biaha pa Curacao, caminda el a causa un furor.

Un aña despues el a biaha cu e team di fuboll Vitesse pa Bonaire, riba e barco El Libertador.

Na Bonaire tambe, el a conquista hopi admirador.

Tempo cu e tabata tin diezcinco aña, el a forma e banda The Melody Band.

E banda aki a bira un exito grandi na Aruba y tabata toca na e clubnan y cinemanan local.

Na diferente ocasion, The Melody Band a representa Aruba den exterior.

E aña 1935 tabata uno importante pa Rufo.

Den e aña ey, el a topa e musico Cubano Carlos Pous,

kende a bishita Aruba cu su show.

Un di e violinistanan di e banda a bira malo, y a pidi Rufo pa ocupa su lugar.

Esey el a haci tambe, despues cu el a adapta e musica cu tabata skirbi originalmente pa violin, pa saxofon.

Banda di piano y saxofon, Rufo tabata toca alavez, guitarra, clarinet y cuatro.

Den e mesun aña, e famoso cantante di tango Carlos Gardel a bishita Aruba y Rufo a toca cu ne tambe.

Inspira pa e Argentino Gardel, Rufo a lanta un banda di tango bao di e nomber 'Los Trovadores Musicales'.

Esaki tabata e prome grupo musical Arubano cu a actua dilanti microfonoman di Radio Curom di Curacao, loke ta awor Z-86.

Den 1934, Rufo a produci su prome composicion, e wals Arubanita.

Añanan despues, Reina anterior di Hulanda Juliana, a baila riba tononan di Arubanita loke pa Rufo tabata un honor grandi.

Na 1975, el a haya decoracion tambe di Reina Juliana.

Den su bida, Rufo a produci riba 400 composicion, den practicamente tur ritmonan Antilano, Latinoamericano y Norteamericano.

Rufo tabata compone riba diferente nivel, cu tabata varia di musica popular pa musica di categoria halto.

Den su composicionnan, por reconoce Aruba.

Varios wals, el a bautiza cu nombrenan cu ta honra su Patria, manera Arubanita, Mi Aruba Stima, Aruba, Bribas di Aruba y Souvenir di Aruba.

Tambe e tabata hinca den su cancionnan, e caracteristicanan di e identidad Arubano, manera e respet cu e Arubiano tin pa su mes, y e alegría, seriedad y gentilesa di e Arubiano.

Otro contribucion na cultura di Aruba tabata e ochenta composicionnan di dje y su coleganan cu el a skirbi.

Ademas el a publica su prome disco cu diezcinco pieza pa piano, cu ayudo financiero di STICUSA.

Su actividadnan como arreglista y compositor pa Cah'i



Orgel, a cuminsa na 1938.

Durante hopi aña, Rufo tabata e unico musico na Aruba cu tabata mantene e Cah'i Orgel, cu su experticia musical y habilidad tecnico.

Aña 1951, a caba cu tragedia pa Rufo.

Durante un blackout riba 15 di december, e auto den cual Rufo tabata sinta hunto cu un paar di amigo, a dal contra un truck di mariniers.

A consecuencia di e accidente aki, Rufo a perde su man robéz.

El a kuma seis luna pa recuperacion na Hospital y den e tempo ey, a bira diabetico loke a haci cu na final di su bida, e tabata practicamente ciego.

Deprimi pa su accidente, Rufo a retira for di musica y bida social.

Pero, e motivacion y sosten grandi cu el a ricibi di su famia y amigonan, mezcla cu su talento y espirito pa sobrevivir a haci cu despues di algun aña, e por a haci su comeback.

Cu yudanza di un man falso, prome importa y dje traha su mes, Rufo a cuminsa toca piano atrobe, adaptando su style di toca remarcablemente bon na su circunstancianan nobo.

Su man drechi a desaroya un velocidad hopi halto, como cu Rufo tabata use awor pa toca e tema y parti di e ritmo.

Cu su man robéz, e tabata re-enforza e harmonia door di touch e nootnan di base singular.

El a cuminsa cu su actividadnan anterior y a sigui

hiba, mas tanto posible, un bida normal.

Na 1950, e himno di Aruba a nace y Rufo tabata tin e honor di tabata su co-compositor.

Na 1954, tabata tin apertura di Voz di Aruba, caminda Rufo tabata toca piano.

Rufo a bishita Venezuela, Costa Rica, Puerto Rico y Curacao, cada biaha ganando mas fans y aprecio pa su logronan musical.

El a graba diferente disco y a parce riba radio y television, tambe den su mesun showman.

Den e ultimo añanan di su bida, el a retira definitivamente di publico y practicamente ciego, a dedica su mes na skirbi musica cu ayudo di su ruman Maria Wever.

Riba 30 di december 1977, Rufo Wever a fayece.

Aruba a rindi tur honor na dje y de acuerdo cu su deseo, Aruba Symphonic Orchestra a toca na su entierro.

Pa su Patria stima, Rufo a laga tras un herencia cultural cu ta un di e mihornan den e region.

Tambe, e prueba cu e mente y perseverancia humano por ta mucho mas poderoso cu strobacionnan fisico o malfortuna.

Rufo tabata e tipo di hende cu ta kere den union.

Mare su musica por keda cerca nos pa semper como ehempel di y inspiracion pa exito pa medo di esfuerzo, amor y cooperacion.

Riba e fotonan hunto cu e articulo, Rufo como mucha y adulto.